

## ახმეტაში მე-12 კლასი ბანკეტის ფულით ეკლესიას ხატს შესწირავს – დამრიგებლის ინიციატივა



ახმეტის მე-2 საჯარო სკოლის მე-12 კლასმა ბანკეტზე უარი თქვა. აბიტურიენტები შეგროვებულ თანხას ადგილობრივ ხატმწერს გადაუხდიათ, რომელიც ივერიის ღვთისმშობლის სახელობის ხატს შექმნის. ხატს ისინი ეკლესიას გადასცემენ.

ინფორმაცია თავდაპირველად ტელეკომპანია გურჯაანმა [გაავრცელა](#), რომლის მიხედვითაც, მოსწავლეებს ბანკეტის გადახდა თელავის ერთ-ერთ რესტორანში ჰქონდათ დაგეგმილი, თუმცა გამოსაშვებ საღამოზე უარი თქვეს.

როგორც კლასის დამრიგებელმა, ნინო ჭილიტაშვილმა On.ge-სთან საუბრისას თქვა, ინიციატივა მას ეკუთვნის:

“ბავშვებისთვის ეს რჩევაც არ ყოფილა, მხოლოდ შევთავაზე და ძალიან მოეწონათ იდეა. მშობლების მხრიდანაც დიდი დაინტერესება იყო. მინდოდა რამე კარგი და დასამახსოვრებელი გამეკეთებინა”.

ის მოსწავლეების მიერ შეგროვებული თანხის ოდენობას “კონფიდენციალურს” უწოდებს:

“ვფიქრობ ეს ჟესტი უნდა იყოს მიმართული იქით, რომ თანხები რაც გროვდება და იხარჯება საბანკეტედ, ამგვარ საქმეებსაც მოხმარდეს”.

ჭილიტაშვილის თქმით, ბიძინა ჩოლოყაშვილის, ელიზბარ და შალვა ქსნის ერისთავების სახელობის ეკლესიის მშენებლობა ჯერ არ დასრულებულა, თუმცა წირვა-ლოცვები უკვე ტარდება.

“ესაა მშენებარე ეკლესია, რომელიც თითო ლარის შეგროვებით, ქველმოქმედებით შენდება და კონინდება”.

დამრიგებელი დასძენს, რომ მისი კლასს წარსულშიც მიუღია მონაწილეობა საქველმოქმედო კამპანიებში, მაგალითად პანდემიის დროს, როცა იმავე კლასის მოსწავლემ დასთან, ხატია ნასყიდაშვილთან ერთად კამპანია, [ერთად ახმეტისთვის](#), წამოიწყო და თვითიზოლაციის დროს, სხვა თანატოლების ჩართულობით, 240 ოჯახს [დაეხმარა](#).

გასულ წელს ქუთაისის მე-14 სკოლის მოსწავლეებმა ბანკეტი არ გადაიხადეს და საკუთარი ინიციატივით, ბავშვთა სახლს [ესტუმრნენ](#).

— [on.ge](#)